



სდასუ

შპს საქართველოს დავით აღმაშენებლის სახელობის უნივერსიტეტი

დამტკიცებულია:

სამართლის ფაკულტეტის

დ ე ბ უ ლ ე ბ ა

მუხლი 1. სამართლის ფაკულტეტის სტატუსი

- 1.1 შპს საქართველოს დავით აღმაშენებლის სახელობის უნივერსიტეტის (შემდგომში: „სდასუ“) სამართლის ფაკულტეტი (შემდგომში: „ფაკულტეტი“) არის სდასუს ძირითადი საგანმანათლებლო სტრუქტურული ერთეული, რომელიც აკადემიური თავისუფლებისა და ინსტიტუციური ავტონომიის პირობებში განხორციელებული საგანმანათლებლო პროგრამებისა და სამეცნიერო კვლევების მეშვეობით უზრუნველყოფს სტუდენტთა მომზადებას და მათთვის შესაბამისი მიმართულების ან/და დარგის/სპეციალობის ბაკალავრის, მაგისტრისა და დოქტორის აკადემიური ხარისხის მინიჭებას.
- 1.2 ფაკულტეტი საქმიანობას ახორციელებს აკადემიური ავტონომიურობის პრინციპებზე დაყრდნობით და ანგარიშვალდებულება სდასუს დამფუძნებლის, რექტორისა და აკადემიური საბჭოს წინაშე.
- 1.3 ფაკულტეტი მოქმედებს საქართველოს კონსტიტუციის, უმაღლესი განათლების ევროპული სივრცის მარეგულირებელი საერთაშორისო ხელშეკრულებების, შეთანხმებების, დეკლარაციებისა და კონვენციების, აგრეთვე „უმაღლესი განათლების შესახებ“ საქართველოს კანონის, სდასუ-ს დებულებისა და წინამდებარე დებულების საფუძველზე.
- 1.4 ფაკულტეტი არ არის იურიდიული პირი.
- 1.5 ფაკულტეტს აქვს საკუთარი ბეჭედი.
- 1.6 ფაკულტეტის ადგილსამყოფელი: ქ. თბილისი, ილია ჭავჭავაძის გამზირი N'25.

მუხლი 2. ფაკულტეტის ძირითადი მიზნები

2.1 ფაკულტეტის ძირითადი მიზნებია:

- ა) მუდმივად პროგრესირებად საგანმანათლებლო სივრცეში არსებული ევროპული კრედიტების ტრანსფერისა და დაგროვების სისტემის შესაბამისი შინაარსისა და სტრუქტურის ხარისხიანი, შრომის ბაზარზე ორიენტირებული კურიკულუმების შემუშავება და შეთავაზება დაინტერესებული პირებისათვის. თანამედროვე სტანდარტების შესაბამისი უმაღლესი განათლებით უზრუნველყოფა;
- ბ) სტუდენტებისა და ფაკულტეტის აკადემიური პერსონალისთვის სათანადო პირობების შექმნა სწავლის, სწავლებისა და სამეცნიერო კვლევებისათვის, სასწავლო-სამეცნიერო მუშაობისათვის პირობების გაუმჯობესებაზე მუდმივად ზრუნვა;
- გ) ქართული და უცხოენოვანი პროგრამების შემუშავება;
- დ) ეროვნულ და საერთაშორისო სასწავლო და სამეცნიერო-კვლევით ცენტრებთან ერთობლივი სასწავლო პროგრამებისა და სამეცნიერო-კვლევითი პროექტების განხორციელება;
- ე) სდასუ-ს სტუდენტთა და აკადემიური პერსონალის მობილობის წახალისება.

მუხლი 3. ფაკულტეტის ამოცანები

3.1 ფაკულტეტის ამოცანებია:

- ა) მაღალკვალიფიციური და კონკურენტუნარიანი კადრების მომზადება, რომლებიც შეძლებენ მიღებული ცოდნის ეფექტიანად გამოყენებას როგორც ქვეყნის შიგნით, ისე საზღვარგარეთ;
- ბ) მაღალკვალიფიციური პერსონალის მოზიდვის ღონისძიებების გატარება;
- გ) ქართული და უცხოენოვანი პროგრამების განხორციელება და განვითარება;
- დ) სტუდენტებისათვის კვლევების განხორციელების უნარ-ჩვევების გამომუშავების ხელშეწყობა;

- ე) სტუდენტების და აკადემიური პერსონალის ინიციატივების/პროექტების მხარდაჭერა;
- ვ) ფაკულტეტის ცნობადობის გაზრდისათვის საჭირო ღონისძიებების განხორციელება;
- ზ) განათლების ევროპულ სივრცეში ინტეგრაცია და მობილობის გაფართოება;
- თ) ეთიკისა და ქცევის ნორმების გაცნობა და მათი დაცვის წახალისება.

მუხლი 4. ფაკულტეტის მართვის ორგანოები და სტრუქტურა

4.1 ფაკულტეტის მართვის ორგანოებია (მმართველი სუბიექტებია): ფაკულტეტის საბჭო და დეკანი.

4.2 ფაკულტეტი მართვის ორგანოების გარდა, შესაძლებელია შედგებოდეს საგანმანათლებლო-სამეცნიერო და სასწავლო სტრუქტურული ერთეულებისაგან.

მუხლი 5. ფაკულტეტის საბჭო

5.1 სდასუ-ს სამართლის ფაკულტეტის საბჭო (შემდგომში: „ფაკულტეტის საბჭო“) სდასუ-ს ძირითადი საგანმანათლებლო და სტრუქტურული ერთეულის, სამართლის ფაკულტეტის წარმომადგენლობითი ორგანოა, რომელიც ახორციელებს ფაკულტეტის მართვას.

მუხლი 6. ფაკულტეტის საბჭოს შემადგენლობა

6.1 ფაკულტეტის საბჭოს შემადგენლობაში შედიან ფაკულტეტის აკადემიური პერსონალის ყველა წევრი და სამართლის ფაკულტეტის სტუდენტთა თვითმმართველობის ორგანოს მიერ არჩეული წარმომადგენლები, რომელთა რაოდენობა შეადგენს ფაკულტეტის აკადემიური პერსონალის ერთ მეოთხედს. იმ შემთხვევაში, თუ აკადემიური პერსონალის რიცხვი 4-ის ჯერადი არ არის, ფაკულტეტის საბჭოში სტუდენტთა თვითმმართველობის წარმომადგენელთა რაოდენობის განსაზღვრისას დამრგვალება მოხდება სტუდენტების სასარგებლოდ.

6.2 ფაკულტეტის აკადემიური პერსონალის წევრად ითვლება სდასუ-ს სამართლის ფაკულტეტის აკადემიურ თანამდებობაზე დასაქმებული პირი.

6.3 ფაკულტეტის საბჭოში სტუდენტთა თვითმმართველობის წარმომადგენლების არჩევის წესი განისაზღვრება სდასუ-ს სტუდენტური თვითმმართველობის დებულებით.

მუხლი 7. ფაკულტეტის საბჭოს უფლებამოსილება

7.1 ფაკულტეტის საბჭო:

- ა) განსაზღვრავს სამართლის ფაკულტეტის საქმიანობის ძირითად მიზნებს, მიმდინარე ამოცანებსა და საქმიანობის პრიორიტეტებს;
- ბ) შეიმუშავებს წინადადებებს ფაკულტეტის აუცილებელ ხარჯებთან დაკავშირებით და წარუდგენს სდასუ-ს რექტორს;
- გ) დეკანის წარდგინებით შეიმუშავებს და სდასუ-ს აკადემიურ საბჭოს დასამტკიცებლად წარუდგენს ფაკულტეტის განვითარების სტრატეგიულ და სამოქმედო გეგმას, საგანმანათლებლო პროგრამებს და სამეცნიერო-კვლევით პროექტებს;
- დ) დეკანის წარდგინებით შეიმუშავებს, განიხილავს და დასამტკიცებლად წარუდგენს სდასუ-ს რექტორს საბაკალავრო და სამაგისტრო ნაშრომების თემატიკას და ხელმძღვანელების კანდიდატურებს;
- ე) დეკანის წარდგინებით იხილავს ფაკულტეტის სტრუქტურას და დასამტკიცებლად წარუდგენს სდასუ-ს აკადემიურ საბჭოს;

- ვ) დეკანის წარდგინებით იხილავს ფაკულტეტის, ფაკულტეტის საბჭოს, სადისერტაციო საბჭოსა და დოქტორანტურის დებულებებს და დასამტკიცებლად წარუდგენს აკადემიურ საბჭოს;
 - ზ) ღია კენჭისყრით ირჩევს ფაკულტეტის საბჭოს მდივანს;
 - თ) ისმენს დეკანის ანგარიშს გაწეული მუშაობის შესახებ არაუგვიანეს ერთი თვისა ახალი სასწავლო წლის დაწყებიდან ან, საჭიროებისამებრ, ნებისმიერ დროს, ფაკულტეტის საბჭოს წევრთა სიითი შემადგენლობის არანაკლებ 1/2-ის მოთხოვნით;
 - ი) აკადემიურ საბჭოს წარუდგენს ცნობილ საზოგადო მოღვაწეს ან აღიარებულ მეცნიერს სდასუ-ს საპატიო დოქტორის წოდების მისანიჭებლად.
- 7.2 ფაკულტეტის საბჭო ახორციელებს საქართველოს კანონმდებლობით, „უმაღლესი განათლების შესახებ საქართველოს კანონით“ და სდასუ-ს დებულებით მისთვის მინიჭებულ სხვა უფლებამოსილებებს.

მუხლი 8. ფაკულტეტის საბჭოს მდივანი

- 8.1 ფაკულტეტის საბჭოს მიერ გაწეული საქმიანობის ორგანიზაციულ უზრუნველყოფას და საქმის წარმოებას ახორციელებს ფაკულტეტის საბჭოს მდივანი, რომელიც აირჩევა ფაკულტეტის აკადემიური პერსონალიდან, დეკანის წარდგინებით, ღია კენჭისყრით.
- 8.2 *ფაკულტეტის საბჭოს მდივანი:*
- ა) უზრუნველყოფს ფაკულტეტის საბჭოს სახელზე შემოსული წერილებისა და დოკუმენტების აღრიცხვა-შენახვას;
 - ბ) ამზადებს წერილებისა და საბჭოზე განსახილველი საკითხების პროექტებს;
 - გ) ამზადებს ფაკულტეტის საბჭოს სხდომებს;
 - დ) უზრუნველყოფს დოკუმენტების გამრავლებას;
 - ე) აწარმოებს ფაკულტეტის საბჭოს არქივს.

მუხლი 9. ფაკულტეტის საბჭოს წევრის უფლებამოსილების შეწყვეტა

- 9.1 ფაკულტეტის საბჭოს წევრს უფლებამოსილება შეუწყდება:
- ა) სდასუ-ს აკადემიური თანამდებობიდან გათავისუფლების ან სტუდენტის სტატუსის შეწყვეტისას;
 - ბ) სასამართლოს მიერ ქმედუუნაროდ, უგზო-უკვლოდ ან გარდაცვლილად ცნობის შემთხვევაში;
 - გ) მის მიმართ სასამართლოს მიერ გამოტანილი გამამტყუნებელი განაჩენის კანონიერ ძალაში შესვლის შემთხვევაში.
- 9.2 ფაკულტეტის საბჭოში სტუდენტთა თვითმმართველობის წარმომადგენლის უფლებამოსილების შეწყვეტის შემთხვევაში, ფაკულტეტის საბჭოს წევრი ხდება ის სტუდენტი, რომელმაც არჩევნებში უფლებამოსილება შეწყვეტილი წევრის შემდეგ ხმების უმეტესი რაოდენობა მოაგროვა. ასეთის არარსებობის შემთხვევაში, სტუდენტური თვითმმართველობა აირჩევს ახალ წარმომადგენელს არაუგვიანეს ერთი თვისა უფლებამოსილების შეწყვეტიდან.

მუხლი 10. ფაკულტეტის საბჭოს წევრის უფლებამოსილების შეჩერება

- 10.1 ფაკულტეტის საბჭოს წევრს უფლებამოსილება შეუჩერდება:
- ა) ერთ თვეზე მეტი ხნით ავადმყოფობის ან შვებულებაში გასვლის შემთხვევაში, თუ მოკლებულია ფაკულტეტის საბჭოს სხდომებში მონაწილეობის მიღების შესაძლებლობას;

ბ) ერთ თვეზე მეტი ხნით სასწავლო ან სამეცნიერო მივლინებაში ყოფნისას ან სხვა გარემოების არსებობისას, რაც შეუძლებელს ხდის მის მონაწილეობას საბჭოს სხდომებში.

10.2 ფაკულტეტის საბჭოს წევრის უფლებამოსილების შეჩერების თაობაზე გადაწყვეტილებას იღებს ფაკულტეტის საბჭო.

მუხლი 11. სხდომების ჩატარებისა და გადაწყვეტილების მიღების წესი

11.1 ფაკულტეტის საბჭოს სხდომას იწვევს ფაკულტეტის დეკანი, ხოლო მისი არყოფნის შემთხვევაში - ფაკულტეტის საბჭოს ერთ-ერთი წევრი ფაკულტეტის დეკანის წინასწარი გადაწყვეტილებით.

11.2 ფაკულტეტის საბჭოს სხდომა შეიძლება მოწვეული იქნეს ფაკულტეტის საბჭოს წევრთა ერთი მესამედის გადაწყვეტილებითაც.

11.3 ფაკულტეტის საბჭოს სხდომები ტარდება საჭიროებისამებრ, მაგრამ არანაკლებ სამ თვეში ერთხელ.

11.4 ფაკულტეტის საბჭოს სხდომებს თავმჯდომარეობს ფაკულტეტის დეკანი, ხოლო მისი არყოფნის შემთხვევაში - ფაკულტეტის საბჭოს ერთ-ერთი წევრი ფაკულტეტის დეკანის წინასწარი გადაწყვეტილებით.

11.5 ფაკულტეტის საბჭოს სხდომებს ესწრებიან ფაკულტეტის საბჭოს წევრები.

11.5¹ ფაკულტეტის დამხმარე პერსონალს უფლება აქვს დაესწროს ფაკულტეტის საბჭოს სხდომებს სათათბირო ხმის უფლებით;

11.5² სხვა, დაინტერესებულ პირთა მხრიდან ფაკულტეტის საბჭოს სხდომაზე დასწრების სურვილის შემთხვევაში, მათი დაშვების თაობაზე გადაწყვეტილებას იღებს ფაკულტეტის საბჭო.

11.6 სფაკულტეტის საბჭოს სხდომა გადაწყვეტილებაუნარიანია, თუ მასში მონაწილეობს ფაკულტეტის საბჭოს წევრთა სიითი შემადგენლობის უმრავლესობა.

11.7 თუ წინამდებარე დებულებით სხვა წესი არ არის დადგენილი, ფაკულტეტის საბჭოს გადაწყვეტილებები მიიღება ღია კენჭისყრით, სხდომაზე დამსწრეთა უმრავლესობით.

11.8 ფაკულტეტის საბჭოს წევრის უფლებამოსილების შეჩერების შემთხვევაში, ამ მუხლის მე-11.6 და მე-11.7 პუნქტებით გათვალისწინებული ხმების რაოდენობა იანგარიშება ფაკულტეტის საბჭოს სიითი შემადგენლობიდან უფლებამოსილებაშეჩერებულ წევრთა რიცხვის გამოკლებით.

11.9 ფაკულტეტის საბჭოს სხდომაზე კენჭისყრა არის ღია, გარდა განსაკუთრებული შემთხვევებისა. ფარული კენჭისყრის ჩატარების საკითხს წინასწარ წყვეტს დეკანი.

მუხლი 12. ფაკულტეტის საბჭოს სხდომის ოქმი

12.1 ფაკულტეტის საბჭოს წევრთა შეკრებისა და სხდომის ჩატარების, აგრეთვე, გადაწყვეტილების მიღების ფაქტზე დგება სხდომის ოქმი, რომელსაც ხელს აწერს ფაკულტეტის დეკანი (მისი არყოფნის შემთხვევაში - ფაკულტეტის საბჭოს ერთ-ერთი წევრი ფაკულტეტის დეკანის წინასწარი გადაწყვეტილებით) და მდივანი.

12.2 ფაკულტეტის საბჭოს სხდომების ოქმები ინახება ფაკულტეტის დეკანის მიერ არანაკლებ 3 წლის განმავლობაში, რის შემდეგაც გადაეცემა სდასუ-ს არქივს.

მუხლი 13. ფაკულტეტის დეკანი

13.1 სდასუ-ს სამართლის ფაკულტეტის ადმინისტრაციული ხელმძღვანელია სამართლის ფაკულტეტის დეკანი (შემდგომში: „ფაკულტეტის დეკანი“), რომელიც

თავმჯდომარეობს ფაკულტეტის საბჭოს სხდომებს და წარმართავს ფაკულტეტის მიმდინარე საქმიანობას.

13.2 ფაკულტეტის დეკანს, ფაკულტეტის საბჭოსთან შეთანხმებით, ნიშნავს სდასუ-ს რექტორი.

13.3 დეკანად შეიძლება დაინიშნოს დოქტორის აკადემიური ან მასთან გათანაბრებული ხარისხის მქონე პირი.

მუხლი 14. ფაკულტეტის დეკანის უფლებამოსილება

14.1 ფაკულტეტის დეკანი:

- ა) ამ დებულებით მინიჭებული უფლებამოსილების ფარგლებში დამოუკიდებლად განსაზღვრავს ფაკულტეტის მიმდინარე საქმიანობის ძირითად მიმართულებებს და ანგარიშვალდებულია ფაკულტეტის და აკადემიური საბჭოს წინაშე;
- ბ) წარმოადგენს ფაკულტეტს და ფაკულტეტის საბჭოს სდასუ-ს აკადემიური საბჭოს და სდასუ-ს რექტორის, სხვა უმაღლესი საგანმანათლებლო დაწესებულებების, საზოგადოებრივი ორგანიზაციებისა და საწარმოების, აგრეთვე, ხელისუფლების ადგილობრივი და უმაღლესი ორგანოების წინაშე;
- გ) თავმჯდომარეობს ფაკულტეტის საბჭოს სხდომებს;
- დ) შეიმუშავებს და ფაკულტეტის საბჭოს განსახილველად წარუდგენს ფაკულტეტის სტრუქტურასა და დებულებას;
- ე) შეიმუშავებს და ფაკულტეტის საბჭოს განსახილველად წარუდგენს ფაკულტეტის განვითარების სტრატეგიულ და სამოქმედო გეგმას, საგანმანათლებლო და სამეცნიერო-კვლევით პროგრამებს;
- ვ) ფაკულტეტის საბჭოს განსახილველად წარუდგენს საბაკალავრო და სამაგისტრო ნაშრომების თემატიკასა და ხელმძღვანელების კანდიდატურებს დასამტკიცებლად;
- ზ) ფაკულტეტის საბჭოს განსახილველად წარუდგენს ფაკულტეტის საბჭოს, სადისერტაციო საბჭოსა და დოქტორანტურის დებულებებს;
- თ) კოორდინაციას უწევს ფაკულტეტზე მიმდინარე სასწავლო-მეთოდურ და სამეცნიერო-კვლევით სამუშაოებს;
- ი) შეიმუშავებს რეკომენდაციებს ფაკულტეტზე მიმდინარე სასწავლო და კვლევითი საქმიანობის ეფექტურობის ამაღლების მიზნით;
- კ) უზრუნველყოფს ფაკულტეტზე სასწავლო-სამეცნიერო საქმიანობის ეფექტიანად წარმართვას;
- ლ) თავისი კომპეტენციის ფარგლებში პასუხისმგებელია სდასუ-ს აკადემიური საბჭოს, რექტორის, აგრეთვე ფაკულტეტისა და სადისერტაციო საბჭოების გადაწყვეტილებათა შესრულებაზე;
- მ) წარმართავს ურთიერთობებს პარტნიორ უნივერსიტეტებთან, საერთაშორისო და ადგილობრივ სამეცნიერო-კვლევით დაწესებულებებთან;
- ნ) განსაზღვრავს ფაკულტეტის საკომუნიკაციო პოლიტიკას;
- ო) წარმართავს და ახორციელებს ურთიერთობებს მასობრივი ინფორმაციის საშუალებებთან, პასუხისმგებელია ფაკულტეტის იმიჯზე, შიდა და გარე კომუნიკაციებზე;
- პ) ორგანიზებას უწევს და წარმართავს საპრეზენტაციო ღონისძიებებს;
- ჟ) განიხილავს და პასუხობს ფაკულტეტის საბჭოში შემოსულ განცხადებებს, პრეტენზიებსა და საჩივრებს;
- რ) ახორციელებს ფაკულტეტზე განცხადებით შემოსულ პირთა მიღებას;

- ს) მეთვალყურეობს და ზედამხედველობს ფაკულტეტზე დასაქმებულთა მიერ უფლებამოსილებების განხორციელებას, ხელშეკრულებით აღებული ვალდებულებების შესრულებასა და სდასუ-ს შინაგანაწესის დაცვას;
 - ტ) ისმენს ფაკულტეტის სტრუქტურული დანაყოფებისა და/ან ცალკეული დასაქმებულების ანგარიშებს გაწეული მუშაობის შესახებ და ახდენს მათ შეფასებას;
 - უ) თავისი კომპეტენციის ფარგლებში, მიმართავს რექტორს წინადადებით დასაქმებულთა წახალისებისა და პასუხისმგებლობის დაკისრების თაობაზე;
 - ფ) პასუხისმგებელია ფაკულტეტისთვის გამოყოფილი სახსრების მიზნობრივ გამოყენებაზე.
- 14.2 ახორციელებს „უმაღლესი განათლების შესახებ“ საქართველოს კანონით და საქართველოს კანონმდებლობით, აგრეთვე სდასუ-ს დებულებითა და შინაგანაწესით მისთვის მინიჭებულ სხვა უფლებამოსილებებს და საქმიანობას, რაც პირდაპირ ან არაპირდაპირ ემსახურება ფაკულტეტის საბჭოს მიზნებს.

მუხლი 15. ფაკულტეტის დეკანის უფლებამოსილების შეწყვეტა

15.1 ფაკულტეტის დეკანს უფლებამოსილება შეუწყდება:

- ა) პირადი განცხადების საფუძველზე;
- ბ) უფლებამოსილების 3 თვეზე მეტი ხნის განმავლობაში განხორციელების შეუძლებლობის შემთხვევაში;
- გ) სასამართლოს მიერ ქმედუუნაროდ, უგზო-უკვლოდ ან გარდაცვლილად ცნობის შემთხვევაში.

15.2 ფაკულტეტის საბჭო უფლებამოსილია, დეკანის მიერ საქართველოს კანონმდებლობის დარღვევის, დეკანისათვის დაკისრებული მოვალეობების არაჯეროვნად შესრულების და/ან დეკანისათვის შეუფერებელი საქმიანობის განხორციელების შემთხვევაში, მიმართოს რექტორს დეკანის უფლებამოსილების შეწყვეტის თაობაზე.

მუხლი 16. ფაკულტეტის სადისერტაციო საბჭო

16.1 ფაკულტეტის სადისერტაციო საბჭო (შემდგომში: „სადისერტაციო საბჭო“) არის სამართლის დოქტორის აკადემიური ხარისხის მიმნიჭებელი ორგანო.

16.2 ფაკულტეტის სადისერტაციო საბჭოს დაკომპლექტების, მისი თავმჯდომარის არჩევისა და საქმიანობის წესი განისაზღვრება ფაკულტეტის საბჭოს წარდგინების საფუძველზე, სდასუ-ს აკადემიური საბჭოს მიერ დამტკიცებული „სადისერტაციო საბჭოსა და დოქტორანტურის“ დებულებით.

16.3 ფაკულტეტის სადისერტაციო საბჭო შედგება დოქტორის აკადემიური ხარისხის მქონე ფაკულტეტის ყველა პროფესორის და ასოცირებული პროფესორისაგან. სადისერტაციო საბჭოს გადაწყვეტილებით საბჭოს შემადგენლობაში შეიძლება შეყვანილ იქნეს დოქტორის ან მასთან გათანაბრებული სამეცნიერო ხარისხის მქონე პირი.

16.4 სდასუ უფლებამოსილია, სხვა უმაღლეს საგანმანათლებლო და სამეცნიერო-კვლევით დაწესებულებასთან გააფორმოს ხელშეკრულება ერთობლივი სადოქტორო საგანმანათლებლო პროგრამების განსახორციელებლად.

მუხლი 17. ბაკალავრიატი

17.1 სდასუ-ს სამართლის ფაკულტეტის ბაკალავრიატი (შემდგომში „ბაკალავრიატი“) არის აკადემიური უმაღლესი განათლების პირველი საფეხურის საგანმანათლებლო

პროგრამა, რომელიც მიზნად ისახავს მომზადდეს შიდა და საერთაშორისო საგანმანათლებლო და შრომით ბაზარზე კონკურენტუნარიანი ბაკალავრის აკადემიური ხარისხის მქონე სპეციალისტები.

17.2. ბაკალავრიატში სწავლა მიმდინარეობს სდასუ-ს აკადემიური საბჭოს მიერ დამტკიცებული საბაკალავრო საგანმანათლებლო პროგრამების ფარგლებში და მთავრდება ბაკალავრის აკადემიური ხარისხის მინიჭებით.

მუხლი 18. ბაკალავრიატში ჩარიცხვის წესი

18.1 ბაკალავრიატში სწავლის უფლება აქვს სრული ზოგადი განათლების ატესტატის ან მასთან გათანაბრებული განათლების დამადასტურებელი დოკუმენტის მფლობელს ან მასთან გათანაბრებულ პირს.

18.2 ბაკალავრიატში ჩარიცხვა ხორციელდება ერთიანი ეროვნული გამოცდების ჩაბარების, შიდა/გარე მობილობის განხორციელების და ერთიანი ეროვნული გამოცდების ჩაბარების გარეშე საქართველოს კანონმდებლობით დადგენილი წესით და სდასუში პირველადი ადმინისტრაციული რეგისტრაციის გავლის საფუძველზე.

მუხლი 19. მაგისტრატურა

19.1 სდასუ-ს სამართლის ფაკულტეტის მაგისტრატურა (შემდგომში „მაგისტრატურა“) არის აკადემიური უმაღლესი განათლების მეორე საფეხურის საგანმანათლებლო პროგრამა, რომელიც მოიცავს სასწავლო, პრაქტიკულ და სამეცნიერო-კვლევით კომპონენტს. მაგისტრატურა მიზნად ისახავს ბაკალავრის შემდგომი დონის სპეციალისტის მომზადებას, პრაქტიკული საქმიანობის განხორციელებისათვის აუცილებელი უნარ-ჩვევების გამომუშავებას და დამოუკიდებელი სამეცნიერო კვლევებისათვის საჭირო უნარების განვითარების ხელშეწყობას.

19.2 მაგისტრატურაში სწავლა მიმდინარეობს სდასუ-ს აკადემიური საბჭოს მიერ დამტკიცებული სამაგისტრო საგანმანათლებლო პროგრამების ფარგლებში და მთავრდება მაგისტრის აკადემიური ხარისხის მინიჭებით.

მუხლი 20. მაგისტრატურაში ჩარიცხვის წესი

20.1 მაგისტრატურაში სწავლის უფლება აქვს არანაკლებ ბაკალავრის ან მასთან გათანაბრებული აკადემიური ხარისხის მქონე პირს.

20.2 მაგისტრატურაში ჩარიცხვა ხორციელდება საერთო სამაგისტრო/საერთაშორისო გამოცდების, შიდა/გარე მობილობის საფუძველზე ან საერთო სამაგისტრო გამოცდების ჩაბარების გარეშე საქართველოს კანონმდებლობით დადგენილი წესის შესაბამისად. სდასუ-ში სამაგისტრო პროგრამაზე მიღების დამატებითი პირობებია: შიდა საუნივერსიტეტო გამოცდები სპეციალობასა და უცხოურ ენაში (B2 დონე).

20.3 მაგისტრატურაში სპეციალობაში ჩასაბარებელი გამოცდების საკითხები, გამოცდის ჩატარებამდე არაუგვიანეს ერთი თვისა განთავსდება სდასუ-ს ვებგვერდზე.

მუხლი 21. დოქტორანტურა

21.1 სდასუ-ს სამართლის ფაკულტეტის დოქტორანტურა (შემდგომში „დოქტორანტურა“) არის აკადემიური უმაღლესი განათლების მესამე საფეხური, რომელიც მიზნად ისახავს ამართლის მიმართულებით სამეცნიერო კადრის მომზადებას და მთავრდება სამართლის დოქტორის აკადემიური ხარისხის მინიჭებით.

21..2 დოქტორანტურაში სწავლა მიმდინარეობს სდასუ-ს აკადემიური საბჭოს მიერ დამტკიცებული სამართლის სადოქტორო პროგრამის ფარგლებში.

- 21.3 სამართლის ფაკულტეტის დოქტორანტურაში სწავლის უფლება აქვს არანაკლებ მაგისტრის ან მასთან გათანაბრებული აკადემიური ხარისხის მქონე პირს, რომელიც აკმაყოფილებს „საქართველოს დავით აღმაშენებლის სახელობის უნივერსიტეტის სამართლის ფაკულტეტის სადისერტაციო საბჭოსა და დოქტორანტურის დებულებით“ დადგენილ მოთხოვნებს, აქვს ინგლისური ენის B2 დონეზე ცოდნა, რაც დგინდება სერტიფიკატის წარმოდგენით ან გამოცდის ჩაბარებით. გარდა ამისა, დოქტორანტურაში ჩარიცხვის კანდიდატი გაივლის გასაუბრებას ან ჩააბარებს გამოცდას სპეციალობაში დადგენილი თემატიკის მიხედვით;
- 21.4. დოქტორანტურაში სწავლის უფლება შეუძლია მოიპოვოს სხვა უმაღლესი საგანმანათლებლო დაწესებულების სამართლის სადოქტორო პროგრამის სტუდენტმა გარე მობილობის საფუძველზე.
- 21.5. „უმაღლესი განათლების შესახებ“ საქართველოს კანონის 50-ე მუხლის შესაბამისად, დოქტორანტურაში სწავლის უფლება შეიძლება მიენიჭოს უცხოეთის უმაღლესი საგანმანათლებლო დაწესებულების კურსდამთავრებულს.
- 21.6. დოქტორანტობის კანდიდატს, რომელსაც ქართულენოვან პროგრამაზე სურს სწავლა და მისი მშობლიური ენა არ არის ქართული, მოეთხოვება ქართული ენის სათანადო დონეზე ცოდნა, რაც დგინდება სერტიფიკატის წარმოდგენით ან გამოცდის ჩაბარებით ქართულ ენაში.

მუხლი 22. დოქტორანტურაში ჩარიცხვის წესი

- 22.1. დოქტორანტურაში საბუთების მიღება ცხადდება რექტორის ინდივიდუალური ადმინისტრაციულ-სამართლებრივი აქტით.
- 22.2. დოქტორანტურაში პირი ჩაირიცხება სადოქტორო პროგრამების ფარგლებში წინასწარ არჩეული სადისერტაციო თემით ან საკვლევე სადოქტორო თემების მიხედვით ჩატარებული საკონკურსო შერჩევის საფუძველზე.
- 22.3. სადოქტორო პროგრამები და საკვლევე თემები განთავსდება სდასუ-ს ვებ-გვერდზე არანაკლებ ერთი თვით ადრე კონკურსის ჩატარებამდე.
- 22.4. დოქტორანტობის კანდიდატმა სდასუ-ს რექტორის სახელზე უნდა წარადგინოს განცხადება.
განცხადებას თან ერთვის:
ა) მონაცემები განათლებისა და შრომითი საქმიანობის შესახებ („CV“);
ბ) სათანადო აკადემიური ხარისხის დამადასტურებელი დიპლომის სანოტარო წესით დამოწმებული ასლი;
გ) პირადობის მოწმობის (პასპორტის) ასლი.
დ) სადოქტორო პროგრამის ხელმძღვანელის (სადოქტორო საკვლევე თემების კონკურსში მონაწილისათვის) ან სადისერტაციო თემის სავარაუდო ხელმძღვანელის შუამდგომლობა სათანადო დასაბუთებით;
ე) განმცხადებლის წერილობითი დასტური იმისა, რომ არ ირიცხება სხვა უმაღლესი საგანმანათლებლო დაწესებულების დოქტორანტურაში.
- 22.5. სადისერტაციო თემის სავარაუდო ხელმძღვანელის შუამდგომლობაში დასაბუთებული უნდა იყოს შერჩეული თემის აქტუალურობა, სიახლე და მნიშვნელობა.
- 22.6. დოქტორანტურაში ჩარიცხვის წინაპირობაა დოქტორანტობის კანდიდატთა შესარჩევ კონკურსში გამარჯვება, რომელიც ორი ეტაპისგან შედგება: პირველ ეტაპზე დოქტორანტობის კანდიდატი გამოცდას ჩააბარებს უცხოურ ენაში (ინგლისურ ენაში) B2 დონეზე (საჭიროების შემთხვევაში – ქართულ ენაშიც) სდასუ-ს რექტორის ბრძანებით შექმნილ კომისიასთან (შესაბამისი სერტიფიკატის არარასებობის შემთხვევაში); მეორე ეტაპზე დოქტორანტურაში ჩარიცხვის

კანდიდატი გასაუბრებას გაივლის/გამოცდას ჩააბარებს სადისერტაციო საბჭოს წევრებისგან სამართლის ფაკულტეტის დეკანის წარდგინების საფუძველზე სდასუ-ს რექტორის ბრძანებით შექმნილ დარგობრივ კომისიასთან;

22.7. დოქტორანტობის კანდიდატი წერილობითი სახით წარმოადგენს საკუთარ ხედვას (კონცეფციას) საკვლევ თემაში/წინასწარ შერჩეულ სადისერტაციო თემაში დანახული პრობლემების გადაჭრის გზების, კვლევის პროცესში გამოსაყენებელი მეთოდების და სავარაუდო შედეგების შესახებ.

22.8. პირი დოქტორანტურაში ჩაირიცხება და სამეცნიერო ხელმძღვანელი ან ხელმძღვანელი და თანახელმძღვანელი დაენიშნება, თუ ღია კენჭისყრისას მხარს დაუჭერს კომისიის სხდომაზე დამსწრე წევრთა უმრავლესობა და გამოცდაში (გამოცდებში) მიიღებს დადებით შეფასებას.

22.9 გასაუბრების წარმატებით გავლის/გამოცდის (გამოცდების) ჩაბარების შემთხვევაში, სადისერტაციო საბჭოს წარდგინებით, პირი დოქტორანტურაში ჩაირიცხება სდასუ-ს რექტორის ბრძანებით.

22.10 ჩარიცხვიდან ერთი თვის ვადაში უნივერსიტეტსა და დოქტორანტს შორის იდება ხელშეკრულება, რომელშიც განისაზღვრება მხარეთა უფლებები და მოვალეობები.

მუხლი 23. ფაკულტეტის დებულების შემუშავება და ძალაში შესვლა

24.1 ფაკულტეტის დებულება დეკანის წარდგინებით შემუშავდება სამართლის ფაკულტეტის საბჭოს მიერ და ამტკიცებს სდასუ-ს აკადემიური საბჭო.

24.2 ფაკულტეტის დებულება ძალაში შედის სდასუ-ს აკადემიური საბჭოს მიერ დამტკიცებისთანავე.

24.3 ფაკულტეტის წინამდებარე დებულების ამოქმედების დღიდან ყოველგვარი ცვლილება-დამატებები მასში ძალაში შევა ფაკულტეტის დეკანის წარდგინებით ფაკულტეტის საბჭოს მიერ შემუშავებული ცვლილება-დამატებების პროექტის აკადემიური საბჭოს მიერ დამტკიცებისა და რექტორის ხელმოწერის შემდეგ.